



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Thomæ A Kempis Canonici Regularis Ord. S. Augustini De Imitatione Christi Libri Quatuor

Thomas <von Kempen>

Coloniæ, 1723

XXV. De ferventi emendatione totius vitæ nostræ.

[urn:nbn:de:hbz:466:1-45773](https://nbn-resolving.org/urn:nbn:de:hbz:466:1-45773)

Bonum tamen est, ut si necdum amor à malo te revocat, saltem timor gehennalis coërceat.

Qui verò timorem Dei postponit, diu stare in bono non valebit, sed diaboli laqueos citiùs incurret.

C A P U T XXV.

*De ferventi emendatione totius  
vite nostrae.*

I. **E** Sto vigilans & diligens in Dei servitio; & cogita frequenter, ad quid venisti, & cur seculum reliquisti. Nonne ut Deo viveres, & spiritualis homo fieres?

Igitur ad profectum ferveas, quia mercedem laborum tuorum in brevi recipies: nec erit tunc ampliùs timor, aut dolor, in finibus tuis.

Modicum nunc laborabis, & magnam requiem, imò perpetuam lætitiā invenies.

Si tu permanferis fidelis & fervidus in agendo, Deus procul-dubiò  
erit

erit fidelis & largus in retribuendo.

Spem bonam & firmam retinere debes, quòd ad palmam pervenies: sed securitatem capere non oportet, ne torpeas, aut elatus fias.

2. Cùm quidam anxius inter metum & spem frequenter fluctuaret, & quadam vice mœrore confectus, in Ecclesia ante quoddam altare se in oratione prostravisset, hæc intra se revolvit, dicens: O si scirem quòd adhuc perseveraturus essem! Statimque audivit divinum intus responsum: Quòd si hoc scires, quid facere velles? Fac nunc, quod tunc facere velles, & bene securus eris.

Moxque consolatus, & confortatus, divinæ se commisit voluntati, & cessavit anxia fluctuatio.

Noluitque ampliùs curiosè investigare, ut sciret, quæ sibi essent futura: sed magis studuit inquirere, quæ esset voluntas Dei bene placens & perfecta, ad omne opus bonum inchoandum & perficiendum.

3. Spera

3. Spera in Domino , & fac bonitatem ( ait Propheta ) & inhabita terram , & pascaris in divitiis ejus.

Unus est, quod multos à profectu & ferventi emendatione retrahit: horror difficultatis seu labor certaminis.

Enimverò illi maximè præ cæteris in virtutibus proficiunt , qui ea, quæ sibi magis gravia & contraria sunt, viriliùs vincere nituntur.

Nam ibi homo plus proficit , & gratiam meretur ampliorem , ubi magis se ipsum vincit , & in spiritu mortificat.

4. Sed non omnes habent æquè multum , ad vincendum & mortificandum.

Diligens tamen æmulator , valentior erit ad proficiendum , etiamsi plures habeat passiones , quàm alius bene morigeratus , minùs tamen fervens ad virtutes.

Duo specialiter ad magnam emendationem juvant : videlicet , subtrahere se violenter , ad quod natu-

E

ra

ra vitiosè inclinatur ; & ferventer instare pro bono , quo ampliùs quis indiget.

Illa etiam studeas magis cavere & vincere , quæ tibi frequentius in aliis displicent.

5. Ubique profectum tuum capias : ut si bona exempla videas vel audias , ad imitandum accendaris.

Si quid autem reprehensibile consideraveris , cave , ne idem facias : aut si aliquando fecisti , citius emendare te studeas.

Sicut oculus tuus alios considerat , sic iterum ab aliis notaris.

Quàm jucundum & dulce est videre fervidos & devotos fratres bene morigeratos & disciplinatos !

Quàm triste est & grave videre inordinatè ambulantes , qui ea , ad quæ vocati sunt , non exercent !

Quàm nocivum est negligere vocationis suæ propositum , & ad non commissa sensim inclinare !

6. Me-

eo  
cap

6. Memor esto arrepti propositi,  
& imaginem tibi propone Crucis  
fixi.

Bene verecundari potes, inspectâ  
vitâ JESU Christi; quia necdum ma-  
gis illi te conformare studuisti, licet  
diu in vita Dei fuisti.

Religiosus qui se intentè & devo-  
tè in sanctissima vita & passione Do-  
mini exercet, omnia utilia & neces-  
saria sibi abundanter ibi inveniet:  
nec opus est, ut extra JESUM aliquid  
melius quærat.

O si JESUS crucifixus in cor no-  
strum veniret, quàm citò & suffi-  
cienter docti essemus!

7. Religiosus fervidus omnia bene  
portat & capit, quæ illi jubentur.

Religiosus negligens & tepidus  
habet tribulationem super tribula-  
tionem, & ex omni parte patitur  
angustiam; quia interiori consola-  
tione caret, & exteriorem quærere  
prohibetur.

Religiosus extra disciplinam vi-  
vens, gravi patet ruinæ.

Qui laxiora quærit & remissiora, semper in angustiis erit ; quia aut unum aut reliquum sibi displicebit.

8. Quomodo faciunt tam multi alii Religiosi , qui satis arctati sunt sub disciplina claustrali ?

Rarò exeunt , abstractè vivunt, pauperrimè comedunt , grossè vestiuntur, multùm laborant, parum loquuntur , diu vigilant , maturè surgunt , orationes prolongant, frequenter legunt , & se in omni disciplina custodiunt.

Attende Carthusienses, Cistercienses , & diversæ Religionis Monachos ac Moniales : qualiter omni nocte ad psallendum Domino assurgunt.

Et ideo turpe esset , ut tu deberes in tam sancto tempore pigritare, ubi tanta multitudo Religiosorum incipit Deo jubilarè.

9. O si nihil aliud faciendum incumberet, nisi Dominum Deum nostrum toto corde & ore laudare !

O si

O si nunquam indigeres comedere, nec bibere, nec dormire; sed semper posses Deum laudare, & solum spiritualibus studiis vacare! tunc multò felicior esses quàm modò, cùm carni ex qualicunque necessitate servis.

Utinam non essent istæ necessitates, sed solummodo spirituales animæ refectiones, quas (heu) satis rarò degustamus!

10. Quando homo ad hoc pervenit, quod de nulla creatura consolationem suam quærit, tunc ei Deus primò perfectè sapere incipit: tunc etiam bene contentus de omni eventu rerum erit.

Tunc nec pro magno lætabitur, nec pro modico contristabitur: sed ponit se integrè & fiducialiter in Deo, qui est ei omnia in omnibus: cui nihil utique perit nec moritur, sed omnia ei vivunt, & ad nutum incunctanter deserviunt.

11. Memento semper finis, & quia perditum non redit tempus. Sine



78 *De Imitatione Christi Liber I.*  
sollicitudine & diligentia, nunquam  
acquires virtutes.

Si incipis tepescere, incipies malè  
habere.

Si autem dederis te ad fervorem,  
invenies magnam pacem, & senties  
leviorem laborem, propter Dei gra-  
tiam, & virtutis amorem.

Homo fervidus & diligens, ad  
omnia est paratus.

Major labor est res sistere vitiis &  
passionibus, quàm corporalibus in-  
sudare laboribus.

Qui parvos non vitat defectus,  
paulatim labitur ad majora.

Gaudebis semper vesperè, si diem  
expendas fructuosè.

Vigila super te ipsum, excita te ip-  
sum, admone te ipsum; quidquid  
de aliis fit, non negligas te ip-  
sum,

Tantum proficies, quantum tibi  
ipsum vim intuleris. Amen.

\* \* \* \*  
\* \* \*

DE

eo

cap